

KANUKOKA-mut aallartitat immikkut ittumik ataatsimiinnerata aallartinnerani oqaaseriumasat

Tamannguassi tikilluaritsi – nuannaarutigaa KANUKOKA-mut aallartitat ataatsimiinnerannut matumunnga tikilluaqqusinnaagassi.

Ukioq ataasingajak KANUKOKA-mi siulittaasuunera ilinniarfigisimaqaara. Soorlumi naluneqanngitsoq, misigisat nuannersut unammillernartullu tullerriaaginnavissimapput, pikkunartorsiornerillu minitaasimangillat, Politikkikkulli sulineq misilittagaqarfigingaatsiareerlugu siulittaasunngorama misilittagaareersut atorluarniarsaralugit suliaq mianeralugu suleqatillu ataqqillugit sulineq ingerlaniarsimavara.

KANUKOKA-mut aallartitat *immikkut ittumik* ataatsimiinnerat manna inuiaqatigiinnit, politikikkut pissutsinik alaatsinaattunit tusagassiorturnillu aamma *immikkut ittumik* maluginiarneqarpoq. Tamatumunnga pissutaasut nalunngilavut. Taakku oqaaseqarfigilaarumaarpakka. Maannali oqaatigisariaqarpara soqutiginninnerup tamatuma takutiinnaraa kommunit KANUKOKA-tut ittumik suleqatigiiffeqarnissaat pisariaqartinneqartoq.

Siusinnerusukkat oqaatigisimasattut kommunit kattuffeqarnerat nunatsinni isorartoqisumi inuiaqatigiit ataatsimoortumik ingerlanniarneqarneranni ataqatigiissinniarneqarnerannilu pingaarutilerujusuarmik inissisimavoq.

Soorunami inuiaqatigiit ataatsimoortumik ataqatigiissumillu ingerlanneqarnissaat qitiusumik oqartussaasut, tassa Namminersorlutik Oqartussat, innuttaasut ulluinnarni sullinneqarnerannut inatsisilornikkut akisussaasutut akisussaaffiginerpaavaat. Kisianni aamma kommunit suleqatigiiffeqarnermikkut Kalaallit Nunaata ataasiusutut ingerlanneqarnissaanut akisussaaqataalluinnarput. Tamannalu KANUKOKA-p piuneranut pissutaavoq.

KANUKOKA-p taamatut akisussaaffeqarnera ulluinnarni puigoqqajaaneqartaraluarpoq. Aammami KANUKOKA-p imminut nittarsanneq ileqqorinnginnamiuk, pisariaqarnera sinnerlugu oqaasertalersuinani tunuliaqutsersuilluni ataqatigiissaarillunilu sulineq kattuffiup ulluinnarni ingerlatsinerata ilisarnaatitoqarigamiuk.

Maanna katersuuppugut KANUKOKA-p politikikkut aaqqissuussaanera nutarterniarlugu, tamatumalu peqatigisaanik kattuffiup allaffissornikkut aaqqissuussaanera pissusiulersut allannguuteqarnerannut naleqqussarniarlugu.

Kattuffiup suleqatigiiffiullu politikikkut aaqqissugaanerata nutarterneqarnissaa ukiut qulit matuma siornatigulli oqallsaalersimavoq siunnersuusiorfigineqartarsimallunilu. Kommunit kattunnerisa nalaanni isumaliutit ingerlaqqissimapput, ukiullu kingulliit marluk ingerlaneranni erseqqinnerulersimallutik tigussaanerulersimallutillu. Tamakku malitsigisaannik periarfissanik assigiinngitsunik siunnersuusiorqarpoq ulluni kingullerni kommunit ilaasortaasut maanna pingasuusut sinniisaannit tamuaqqinneqartunik.

Nuannaarutigalugulu maanna oqaatigerusuppara oqaloqatigiinnerit kingunerisaannik aaqqiissutis-
sanik tamanit isumaqatigiissutigineqarsinnaasunik maanna saqqummiussisoqartussanngormat.

Kattuffiup malittarisassaanut nutaanut siunnersuutit erninnaq saqqummiunneqassapput. Taakkulu
imarisaat erseqqinnerusumik oqaatigineqartussaammata pingaarnersiullunga oqaatigisinnaavara
KANUKOKA-p kommunit suleqatigiiffiattut kommunillu sinnerlugit isumaqatiginninniarsinnaasu-
tut pisinnaatitaaffii erseqqissarneqarmata. KANUKOKA inatsisitigut pisinnaatitaaffilerneqarnini
malillugu sulissaaq. Siulersuisullu pisussaaffilerneqassapput kommunit ingerlanneqarnerinut pin-
gaaruteqartunik aalajangigassaqartillutik kommunabestyrelsinut tusarniaasarnissaminnut. Tamakku
tamarmik malittarisassanut siunnersuutini erseqqissarneqarput – siornatigut erseqqissumik allassi-
manngitsut, taamalu nalornisitsisarsimasut.

Aamma taarusuppara politikikkut ikinnerussuteqartut kattuffiup siulersugaanerani sunniuteqarsin-
naanissaat malittarisassani siunnersuutigineqartuni erseqqissarneqarlunilu qulakkeerniarneqarmat.
Tamannalu soorunami pingaaruteqarpoq kattuffiup (imaluunniit suleqatigiiffiup) tamatigoortumik
illuinnaasiunngitsumillu tunuliaqutaqarluni ingerlanneqarnissaanut.

Saqqummiunneqartussat tamakku ulluni kingullerni oqaloqatigiissutigineqarnerisigut maluginiar-
para tamanit isumaqatigiissutigineqarsinnaasumik saqqummiussisoqalersoq. Tamanna nuannaaruti-
gaara. Aammalu qanoq nuannertigissagalarpa ullumi kommunit tamarmiulluta maaniittuugaluarut-
ta. Naluneqanngitsutummi januaarip aallaqqaataaniit kommunit sisamaat ilaasortaajunnaarpoq.

Tamanna siulittaasutut arlaleriarlunga ajuusaarutigalugu oqaatigisarsimavara. Kisianni Kommune-
qarfik Sermersuumut oqarusuppunga: KANUKOKA-mi suleqataaleqqinnissassinnut qaqugukkul-
luunniit tikilluaqqusaajumaarput!

Taamatut oqaaseqarlunga aallartitat immikkut ittumik ataatsimiinnerannut matumunnga tikilluaq-
qoqqikkusuppassi.

Palle Jerimiassen, siulittaasoq